

誠齋詩集

冊八

廣雅釋義

卷八

楊文節公詩集卷之三十八

宋吉水楊萬里廷秀甫譔

長陽後學彭淑秋潭甫校訂

繡谷宗裔雲彩雨亭甫全校

退休集

二月十四日留子西材翁弟晚酌

丁流迷沈一小炷聚作香烟散金霧清尊相屬對花前政是一年春好處海棠  
初試別樣妝垂絲新出濯錦江杏花欲落桃李折牡丹未折國色香酒行莫忙  
且一盞一盞一番一行散偏行九徑却重行莫遣一花不相見酒教少酌花多  
看看盡千花却深勸今宵無月不須燈千樹李花如晝明

登度雪臺下臨桃李徑

桃花夾外李當中三徑花開兩徑紅獨繞畫簷無箇事自攜團扇撲黃蜂

萬花川谷海棠盛開進退格

四面週遭國艷叢危亭頓在艷叢中天開錦幄三千丈日透紅妝一萬重積雨

乍晴還楚楚東風小緩莫匆匆爲花一醉非難事且道花釀復酒釀

積雨小止暫到東園雨急卽歸

咫尺東園千里迢欣逢小霽路逍遙鷺穿秧稻新黃脚蟲禿金沙嫩紫條城市簷間堪繫纜山溪夜半失危橋忽忽行散還歸去一陣飄蕭不見饒

四月二十八日祠祿秩滿感恩進退格

隨牒江湖四十年寄名臺閣兩三番全家廩食皆天賜晚歲祠官是地仙匹似分司轉閑散世無拜表及寒溫明朝更着毛錐力十字名銜尙請牋

荷池小立

池小泉多強欲留留他不住恁他流荷盤不放荷尖出穿破盤來却又休

贈閣皂山嬾雲道士詩客張惟深二首

閣皂峯頭半朵雲化爲道士到吾門問渠真箇如雲嬾爲許隨風處處村羽客來從閣皂山殷勤告訴病詩癩古今此病尤無藥癩到陰何便是仙

料理小池荷

側塞浮荷更泛苔爲芟數路水痕開魚兒便喜新開港繞去繞來千百回

六月十六日夜南溪望月

溪水留我住溪月愁我歸望後月更佳昨宵未爲奇大都月色好一歲能幾時  
人散常是早月來常是遲初出如大甕纔露金半規不知獨何急下如有人推  
忽然脫嶺尖行空安不危似愛溪水淨下浴青琉璃明珠徑餘尺沈在千頃陂  
我欲刺雙手就溪取團暉白水忽亂跳碎作萬金飛須臾波浪定化爲水銀池  
夜久看未足風露泣病肌儂尙能小留瘦藤歌式微一笑顧羣從來夕肯集茲

送吉州趙山父移廣東提刑

越臺海山清更雄曲江間出曲江公憲臺師表光且耿濂溪留下濂溪井趙侯  
端是宋廣平妙年策名千佛經陽春有脚來江城銀漢乘槎移使星嶺上梅花  
莫遲發先遣北枝迎玉節寄聲多賀帽子峯今歲峯頭有霜雪

提刑衙后一峯名帽子

擬吉州解試秋風楚竹吟詩

客子正行日偏逢楚水秋一風來瑟瑟萬竹冷修修吹作清霜骨聲酣古渡頭

斑林寒更裂碧節爽還幽亦復披襟袂長懷落月愁少陵詩思苦送別更冥搜  
題星子黃宰世高問政堂

黃子儂故人危子儂門生向來同登漱玉亭銀河洗面醉不醒四年二子不見  
面過眼光陰掣飛電今晨忽得問政碑黃子作堂危子詞危子筆力乃爾進黃  
子佳政不須問寄言二子各努力古人也是人作音得

大丞相益國周公訪予于碧瑤洞天劉敏叔寫以爲圖求予書其後

平叔曾過魏秀才何如老子致元台蒼松翠竹青苔逕也不傳呼宰相來

丞相周公招王才臣中秋賞桂花寄以長句

素娥大作中秋節一夜廣寒桂花發天風吹墮綠野堂夜半瑤堦丈深雪梅仙  
不知天尙秋只驚香雪點梢頭笑隨玉妃照粉水洗妝同入月中游晉公賞梅  
仍賞桂獨招子猷雪前醉明朝有客訴天公不喚香山病居士

寄題開州使君陳師宋柴扉

屋是茅一把門是柴一束是間着宇宙太倉半粒粟吾聞陳家扉樣似陶家屋

孤松不須雙五柳何用六竹籬東復東添種數叢菊賸肯早歸來盈尊酒初綠  
寄題吳仁傑架閣玩芳亭

洞庭坡上木葉脫巫山宅前野花發子規啼殺不見人空令千載憶靈均春蘭  
九畹百畝蕙自榮自落誰能佩澤國東山最上頭有客玩芳杜若洲舟人夜上  
人鮪甕手掇騷人衆芳種歸來夢到閨風臺靈均花草和露栽寄言衆芳未要  
開更待誠齋老子來

寄子文弟南溪奇觀

行盡三江與五湖江湖元只近吾居一陂秋水鎔銀汁萬里青天落玉壺每約  
弟兄人定後恣看風露月來初老夫詩句休拈出漏洩南溪奇觀圖

賞菊四首

老子平生不解愁花開酒熟萬年休若教不爲黃花醉枉却今年一片秋  
菊花肯爲別人黃長怨先生不斷腸兩岸盡凋無地插一杯細嚼入神香  
菊生不是遇淵明自是淵明遇菊生歲晚霜寒心獨苦淵明元是菊花精

物性從來各一家誰貪寒瘦厭妍華菊花自擇風霜國不是春光外菊花

白菊二首

白菊初開也自黃開來開去白如霜小蜂老得針來大不怕清寒嗅冷香  
霜後黃花頓不中獨餘白菊鬪霜濃與霜更鬪晴天日鬪得霜融菊不融

芙蓉盛開戲簡子文克信

芙蓉得雨一齊開開盡花時客不來到得客來花已老晚妝猶可兩三杯

曉穿芙蓉徑二首

晚妝懶困曉妝新火急來看趁絕晨夾道花枝欺我老競將紅露灑烏巾  
芙蓉佳處不勝佳花不中藏祇外斜恰似曲江聞喜宴綠衣半醉戴宮花

送簡壽玉主簿之官臨桂二首

蘭溪傾蓋杏風殘桂嶺離裾菊露寒聽子新詩過夜半吹儂秋思入雲端往吟  
平地千蒼玉還憶孤舟一釣竿四海如今習鑿齒大官莫作小官看

柴門草徑儘莓苔不放黃塵俗子來詩客清晨衝雨入梅花一夜爲君開飄蕭

落葉殘燈火陸續清談濁酒杯二十六年纔四面驪駒抵死祇相催

殘菊

腸斷黃花霜后枝花乾葉悴兩離披一花忽秀枯叢裏更勝初開乍見時

秋圃

何處秋深好山林處士家清霜紅碧樹白露紫黃花一熟仇頻雨朝晴禱暮霞  
連宵眠不着猶自愛新茶

與侯子雲溪上晚步

人入溪園自掩門溪流新落兩三痕杖藜紫菊霜風徑送眼丹楓夕照村行住  
忽然忘近遠陰晴未肯定寒暄多時不出今聊出牧子樵兒一笑喧

十一月朔早起

拋笏投簪四見秋宦情世味兩俱休塵隨日影穿窗喜葉卷風聲刮地愁文武  
自勻香底火聖賢教帶老時簪夜來富貴非人世夢釣滄浪雪滿舟

新晴

瑤霜珠露兩相鮮  
玉宇金鉦萬里寬  
欲作一晴多少日  
早知祇費數朝寒  
暴禾場裏雞豚樂  
試筆窗前紙墨乾  
兒女莫貪新浙飯  
打頭荷甌且輸官

嘲蜂

薰籠烘藥較香些  
引得蜂兒繞室譁  
笑死老夫緣底事  
蜂兒專用鼻看花

留蕭伯和仲和小飲二首

野果山蔬未要多  
濁醪清酒儘從他  
不因兩殘三杯裏  
奈此千愁百惱何  
山倒莫教扶玉樹  
尊空別得借銀河  
少陵一語君知麼  
不見堂前東逝波

誰憎白日上青天  
誰羨千鍾況萬錢  
要入詩家須有骨  
若除酒外更無仙  
三杯未必通大道  
一斗真能出百篇  
李杜飢寒纔幾日  
却教富貴不論年

新晴東園晚步二首

一日秋陰一日晴  
山禽相賀太丁寧  
不愁白髮千莖雪  
隨喜黃庭一卷經  
晚霧薄情憎遠嶺  
夕陽無意戀危亭  
孤吟莫道無人覺  
松竹喧傳菊細聽

忙裏清流也帶塵  
鬧中底物不長新  
水將樹影拖空帶  
楓換秋容作好春  
自是

不歸歸便得老來下筆筆如神鶯花剪燭無虛日錢送誠齋一老人

新霜

得得今來未有寒天公小靳不全刊欲呈瑞雪飛花樣先遣濃霜起草看瓦脊  
生春總瓊玉梅梢着粉忽琅玕老夫到老嫌冬熟十指朝來出袖難

餐霜醒酒

宿酒朝來醉尙殘覺懷耗燥腹仍煩牡丹垓上欄干脚自刮霜毬衰舌端

梅菊同插硯滴

兩枝殘菊兩枝梅同入銀罌釀玉醅得得陶泓真箇渴二花酒熟與三杯

冬至霜晴

油簾雪白日猩紅老子良圖策雋功自曬絲裘并衲袴誰知衣桁是薰籠絕憐  
寒菊枯根底留得殘霜過日中舊說冬乾年定濕試將今歲試南翁

米伯勤同子文弟幼楚姪來訪書事

板橋再葺岸頭橫茅屋新添樹外明山勢追回一溪水波光飛到萬花亭沉烟

久冷爐猶馥簾子閑垂脚自平坐看千林總黃落只餘蘭蕙向人青

與伯勤子文幼楚同登南溪奇觀戲道旁羣兒

鬢鬆睡眼熨難開曳杖緣溪啄紫苔偶見羣兒聊與戲布衫青底捉將來

曉行東園

霜後前林一向疎丹楓落盡沉黃梧犯寒侵早宜看菊怕熱平生不擁爐老眼讀書長作睡病身得酒忽全蘇好詩排闥來尋我一字何曾愁白鬚

至後十日雪中觀梅

小樹梅花徹夜開侵晨雪片趁花回卽非雪片催梅發却是梅花喚雪來琪樹橫枝吹腦子玉妃乘月上瑤臺世間除却梅和雪便是冰霜也帶埃

飲酒

今日偶不飲無事亦有思偶然舉一杯事至我不知豈獨忘外事此身亦如遺此酒本何物秫先麴還隨飯秫祇醒眼嚼麴無醉時秫麴偶相逢清泉媒灼之不知獨何神幻出忘世姿莊周不須周惠施不須施貴賤與死生不齊元自齊

我本非縉紳金華牧羊兒祇坐讀書人一出不得歸歸來今四年似早其實遲  
海中無蓬萊蓬萊在酒池今夕一杯酒乘風駕雲旗猶遭世緣縛未掛神武衣  
雪後領兒輩行散

今日意不愜出游聊逍遙父子自爲伴何須外招邀過溪足小倦臨流坐危橋  
回頭顧吾廬竹樹翳草寮獨有萬花亭巋然出山椒高陂瀉溪水環佩鏘瓊瑤  
飛流迸空起平水和天搖春淙到潭底勢盡自浮漂蟹眼沸不停雪山湧還消  
近觀絕洶洶遠聽漸蕭蕭忽逢綠頭公攜竿鼓舟橈喧呼葦間出得意似兒驕  
我行爲小立流魚偶雙跳人物各自適茲游定誰超

中塗小歇

山僮問游何許村莫問何許但出門脚根倦時且小歇山色佳處須細看道逢  
田父遮儂住說與前頭看山去寄下君家老瓦盆他日重游却來取

雲際寺前山頂却望幡竿鷓鴣諸山二首

幡竿嶺帶鷓鴣山雪後霜前紫翠間自掇胡床移好處莫教漏眼一烟鬟

遠近青山列畫屏  
近山濃抹遠山輕  
高屏已出低屏外  
更有孤峯出一層

游雲際寺諸僧皆出因過田家

游徧諸峯欲晚霞  
倦投野寺覓煎茶  
更無一箇殘僧在  
歸路却投田舍家

歸路過南溪橋二首

霜風一動嶺雲開  
雲外樵歌暮更哀  
童子隔溪呼伴侶  
併驅水牯過溪來  
愛他風物重徘徊  
歸路遲遲却快哉  
曲折緣溪非細好  
忽逢斷岸却回來

荷池

小池歲晚石泉寒  
荷葉低垂綠柄乾  
一似漁人暮歸後  
敗蓑破笠掛魚竿

簷滴

簷滴疎疎亦幾何  
滴將苔砌出園窠  
就中漱滌偏精巧  
泥土都無石子多

與山莊子仁姪東園看梅四首

仰樹看花不見梅  
聞香疑有別園開  
更行數步偶回首  
却被青松映出來  
梅花不是雪家仙  
雪裏如何不怕寒  
凍脫龍髯冰却海  
千花試與鬪來看

手種江梅五百窠小窠開早更花多就中一樹尤清絕惱殺先生看殺他  
步繞梅花徧一園得花妙處忽忻然元來別有看花眼笑向山莊死不傳

歲暮歸自城中一病垂死病起遣悶四首

索居猶寡歡巾車入城闐親舊久不見一見交相欣挽衣招我飲惟恐我出門  
不招我亦往不留我亦存殷勤復如許不住我豈真是時梅始花吹香落金尊  
酒冽肴果富咀啜俱芳珍丞相我知己太守我故人言非汰塵雜塵雜不入言  
初談聖賢髓終談天地根向晚銜杯酒不樂復何云

出郭雲尙明反郊日忽暮不思日晷短却信雲已誤駿奔六七里逢店破亦住  
澆愁幸殘尊照睡欺短炬荒雞喚野夢晨起念速步升高仍復下故病動中腑  
昏耗懷欲絕低回不能去僮僕強我歸偶不隕中路老夫猶倚強疾在自不悟  
及茲一委頓去死僅寸許人生信浮脆可笑何足懼所懼棄官晚行樂今已遽  
食罷游東園慨然傷我懷昨日病臥時自謂不復來入門大風起萬松聲頓哀  
病骨念不堪欲行重徘徊徘徊南齋前小倦坐苔堦齋前花不多上有兩古梅

似知我至此頃刻忽盡開多情梅間竹偃風特奇哉不知喜風舞爲復怯風回  
萬象皆迎春我獨老病催明日能來否今歸且徘徊

病起行不得坐久情不舒倔強妻子前欲扶羞索扶且呼斑竹君寸步與我俱  
遠行亦未決聊復循庭除平地誰云覺陟降卽少徐平生四方志入極視若無  
西飛折若木東騫騎鯨魚卽今臥藜床一起還九噓力憊志猶在床頭葺湛盧  
丙辰歲朝行東園

元日扶衰看早春嫩苔一徑落梅新鮫人舞罷凌波襪踏徧真珠滿網勻  
題張垣夫腴莊圖三首

百里青山十里溪荷花萬頃照紅衣臨平山下西湖上都被腴莊掇取歸  
花光泉響不相參城市山林難兩兼不分腴莊最無賴一時奄有忒傷廉  
花開還喜落還嗟却被腴莊惱却些何似老夫展橫軸一朝看盡四時花

東園晴步二首

淺暖疎寒十日晴桃花紅暗李花明小蜂撲得渾無益凋扇徒勞不作聲

金沙遶架臥春風，節節新條出嫩叢。一色勻排綠瓊子，忽然半縷偏深紅。

曉登萬花川谷看海棠二首

夜雨朝晴花睡餘，海棠傾國萬花無。館娃一樣三千女，露滴臙脂洗面初。  
準擬今春樂事濃，依前枉却一東風。年年不帶看花眼，不是愁中卽病中。

走筆送趙正則司戶來訪觀親庭

捧檄親庭歸帽斜，肯臨破屋玉川家。小留詩客三杯酒，試看山園幾處花。人到東湖與南浦，時當芍藥替金沙。却來書滿參鄉好，徑泛銀河犯斗槎。

東園社日

風雨催殘桃李枝，東園無樹不離披。海棠過後殘花在，恰似上春初發時。

觀社

作社朝祠有足觀，山農祈福更祈年。忽然簫鼓來何處，走殺兒童最可憐。虎面豹頭時自顧，野謳市舞各爭妍。王侯將相饒尊貴，不得渠儂一餉癡。

上巳日復同子文伯莊永年步東園三首